

TERZ MOND

Honduras: ena Surmirana e la sia tgesa d'unfants

Gl'è davanto en pensum per la veta



Scu egna dallas premissas las pi impurtantas per aver perspectives per igl futur considerescha Patricia Scarpatetti ena buna scolaziun. Iglis unfants da sia tgesa von an ena scola privata, manada da mongias. Chella è miglra tgi las scolas digl stadi, pero uniforma è tradiziun er a cò.

● **pb.** Oz la sagonda part da nossa rapportascha dalla Surmirana, Patricia Scarpatetti tgi ò biagia se ena tgesa per unfants dalla veia a Honduras. Tgi igls unfants pon eir a scola è ensatge digl pi impurtant. Per saveir realisar chegl dovrigl er daners e la situaziun finanziaria è sa midada.

2. part (2/3)

Ainten scolas privatas

Actualmaintg èn ainten la tgesa «yo quiero ser...» 32 unfants, 13 mattatschas e 19 mattatschs. 26 dad els von er a scola. «Els von tots an ena scola privata manada da mongias, pertge las scolas publicas digl stadi valan pac», commentescha Patricia Scarpatetti. «Ena buna scolaziun, forsa pi tard en studi all'universidad, tetels, chegl è igl sulet tgi so dar ena perspectiva alla giuventetna da chesta tera. Uscheia onigl aglmanc ena schanza da rivar tar ensatge», cuntinuescha ella.

E chels unfants vignan survigilos ainten la tgesa dad ena educatoura per igls pitschens, dus educatours per chels pi gronds, dus cuschinieras, ena donna tgi lava e nategia, igl psicolog, en gioven tgi è cò per tot chegl tgi fò gist basigns ed en guardian. Patricia sezza è, dasperas er en tant lavour scu educatoura, responsabla per tot las tgosas administrativas digl antier travagl. E naturalmaintg vignan er igls unfants, zont chels pi vigls, integros ainten las lavours da mintga de. E per

part vegian els er gio sviluppo en bung anchign manual per las pi diversas lavours.

Midada la situaziun finanziaria

Tiers la tgesa d'unfants tanschevan igls meds finansials tgi nivan dalla Svizra er per treis clinicas an divers lis digl martgea. Cun clinicas ins tgapescha tgesas, noua tgi la populaziun pudeva neir regularmaintg tar en tractamaint medical per las tgosas las pi basignevas. Regularmaintg eran cò medics tgi faschevan las controllas las pi simplas, davan igls medicamaints basignevels, cuntschivan rottadeiras, cusivan plaias e curavan malsognas. E cò niva gliout tgi saveva ord atgna forza finanziaria betg prestar dad eir ainten en spital e betg paer igls medicamaints. Er chellas clinicas nivan finanztgeidas antras igl project da Patricia Scarpatetti. E vetiers ins veva er anc cumpro en camiun ed indrizzo chel scu clinica ambulanta tgi geva da taimp an taimp tar la gliout an vischnancas fitg povras tgi veivan agl our dalla societad.

Las turbulenzas tar las bancas, tar la bursa e segl sector finansial an general on er mido la situaziun finanziaria per igls projects a Honduras. Igl gudogn alla bursa da chesta gruppa svizra è sto fitto e cotras er igl sustign finansial per Honduras. Per Patricia Scarpatetti è chegl do ena midada radicala petutgont las finanzas. An chel li ins stò pero er menziunar tgi ella niva e vign er anc oz sustigneida

adegna puspe e regularmaintg da vart privata or dalla Svizra. Seia chegl cun vistgadeira e cun oters bagns materials, pero er cun donaziuns da persungas privatas, uniuns ed instituziuns tgi rimnan daners e laschan rivar tiers chels per igl project da Patricia a San Pedro Sula. Pero mantgeva ena antrada regulara per saveir finanztgier tot ansemen. Essend tgi igls daners tanschevan betg ple per tot ins ò stua dessister a tschertas tgosas, uscheia allas clinicas aint igl martgea. Ed ins è sa concentro ossa cumpletmaintg sen la tgesa d'unfants.

Ena fundaziun

Per dar la dretga furma all'organizaziun purtadra e per sierar la finanzaziun a media vista è neida messa an peis igl 2010 ena fundaziun. Per esser exact èn chegl dus fundaziuns: egna a Honduras ed egna an Svizra. La fundaziun a Honduras ò ple u manc «angal» la funcziun da vurdar tgi tot chegl tgi ins fetscha seia ainten en rom legal e cumpatibel cun igl stadi ed igls sies reglamaints. Uscheia tgi igls unfants èn registros e veivan cun la legitimaziun digl stadi ainten la tgesa «yo quiero ser...», tgi els visetan ena scola rancunascheida e tgi tot chegl tgi vign do ad els ainten la tgesa d'unfants seia an rughel. «Igl stadi dumonda betg siva tge tgi nous fashagn ed el ans sustigna er betg finanztmaintg, ma tuttegnà stò tot esser conform cun las directives dalla regenza», declera Patricia.

La sagonda fundaziun e la principala tgi sa cloma er «yo quiero ser...» è neida fundada an Svizra. Ella sa cumpona dad en cunsegl d'administraziun, noua tgi Patricia è la presidenta. Dasperas ella fon part Gerard van Kesteren, igl CEO dall'interpresa Kühne & Nagel, ena interpresa svizra tgi è activa internaziunalmaintg cun transports da roba. Ella procure-scha er tgi igl container cun mobiglia, bancs da scola, vistgadeira ed otra roba per la tgesa d'unfants reiva a li. Gerard van Kesteren fò er la contabilitad per la fundaziun, la bilantscha, igl preventiv e la correspondentscha cun las bancas. En ulteriour commember digl cunsegl è Peter Hofmann-Sonder, tgi ò cun sia donna Greta ena tgesa a Salouf. El tgira la correspondentscha cun las autoritads ed uffezis e cun igls donatours. Ed igl quart commember è Giatgen Scarpatetti, igl barba da Patricia tgi stat a Son Murezza. El fò l'administraziun da paias, AVS, cassa da pensiun, cassa da malsangs, sieranzas etc. E Patricia Scarpatetti sezza ò fatg ed actualisescha la pagina d'internet (www.yoquieroser.org). Ella è er la persunga da contat tranter la tgesa d'unfants ed igl cunsegl d'administraziun.

Pigl antier travagl dalla tgesa d'unfants cun ampluias, damagler, masdegnas, scolas, auto, benzina etc. dovran els radond 9 000.– fr. agl meis. E tgi chels raps reivan a Honduras, per gl'ez procurescha la fundaziun.



E cuntrari digl conturn tgi igls unfants vivevan avant, on ossa els regularmaintg damagler sen meisa.